

Dahsau Gvangjsih Fwngzsoem San Aen Siengjmuengh Mancuengh Hajsak Yenzgiu Cauhguh Haifat Fanman Cauhnduj Miz Daegsaek

广西妹子巧手编织五彩壮锦梦 研发特色原创产品

□ Cinz Leij Daut Lingzsiu raiz Dahdingz hoiz

Mbwn fuemx roengzdaej, gij rongh aendaeng baenz di baenz di sajdoek youq ndaw hawsingz, ndaw ranz Yiz Mingzfung nanz mbouj nanz miz gij sing daemjrok cienz okdaej, buenxriengz aendaueq cuenq bae cuenq dauq, baenz diuz baenz diuz mae miz saek san ok baenz fan baenz fan Mancuengh dozanq sengdoengh, saekdiuh ronghsag.

Haj bi seizgan, daj ngamq hainduj mbouj rox saekdi, daengz sugrox yungh gak cungj fuengfap daemj man conzdungj, caiq daengz yungh Mancuengh yenzgiu cauhguh haifat gij huq vwnzva cauxeiq miz daegsaek, Yiz Mingzfung caueq Mancuengh giet roengz yienzfaenh naekna. Hawj gij dinfwngz fwngzguh conzdungj yo youq ndaw mbanj laeglaeg haenx ndaej doenggvaq cungj fuengsik wng yienh okdaej, de hix laegdaueq roxyinh daengz gij yihi baujhoh caueq swncienz feihvuzciz vwnzva yizcanj.

Yiz Mingzfung youq Gvangjsih Bozvuzgvanj guhhong, fucwz gij hong haifat caueq dajveh gij huq vwnzva cauxeiq.

Gij bienqvaq gvaqbae 5 bi

Haj bi gaxgonq, Yiz Mingzfung doiq Mancuengh lij dwg byongh rox byongh mbouj rox. Aenvih guhhong, de miz gihvei haeujlaeg Gvangjsih gak dieg bae hag caueq roxyiuj gij dinfwngz daemj man Bouxcuengh, caemhcaiyouq mboengq haenx maij hwnj Mancuengh, hainduj hag gij fuengfap daemj Mancuengh, yenzgiu gij vwnzva Mancuengh, seizneix engq dwg roengzrengz youq yenzgiu cauhguh haifat gij huq vwnzva cauxeiq Mancuengh.

Gij maqmuengh coglaeng 5 bi

Maqmuengh ndaej doenggvaq bonjfaenh roengzrengz hawj engq lai vunz nyinhrox caueq maij hwnj Mancuengh, caemhcaiyouq doenggvaq yenzgiu cauhguh haifat gij huq vwnzva cauxeiq yiengh gyaundeih youh miz yungh haenx, hawj faenh dinfwngz gaeuqgeq gaenq cienz roengzdaej gig nanz neix fatok rengzhoengh moq.

Guhhong diuyenz ndaej raen gij dinfwngz Mancuengh

Mancuengh vih gijmaz ndaej haenh baenz seiq cungj man hung okmingz Cungguk ndawde cungj ndeu? Gij fuengfap daemj de miz gijmaz daegbied? Gij doz mbouj doxdoengz miz gijmaz eiqsei? Danghnaeuz dwg youq haj bi gaxgonq, Yiz Mingzfung wnggai caueq bouxwnq doxlumj, roxyiuj Mancuengh dandan daengx youq gwnz biujmienh eiqsei cihsaw, roxnaeuz dan dwg maij, mbouj bae damqcaz yenzgiu gij gojgaeq raeblaeng de, engq mbouj rox raeblaeng moix fan Mancuengh hamz miz gij yunghsim baenzlawz yiengh.

Bi 2012, Yiz Mingzfung lij dwg bouxvunz moq ngamq camgya guhhong, cujyau youq Senhgyaubu Gvangjsih Bozvuzgvanj guh gij hong ciepdaih. Bihaenx, canghheiq guh gij huq fwngzguh daj Daizvanh daej haenx dajsuenq daej Gvangjsih gak

dieg gaujcaz diuyenz gij cingzgvang seizneix gij huq fwngzguh conzdungj haenx, Yiz Mingzfung bouxvunz bae buenx neix daj neix hwnj haiok le duenh ginglig miz daegbied yihi ndeu.

Youq mwh doihgaujcaz daeujdaengz Cingsih, Yiz Mingzfung raen daengz Mancuengh gij huq fwngzguh minzcuz cei q miz daibyausing dieg Bouxcuengh Gvangjsih haenx. Youq bi 2006, gij dinfwngz man Bouxcuengh Cingsih couh ndaej liedhaeuj gij mingzloeg baujhoh buek daih' it feihvuzciz vwnzva yizcanj guekgya, couhcinj ndaw ranz vunz lai bingzciengz gaenq gig noix raen gij ciengzgingi mehdaemjrok yungh congzrokfaex daemjrok, hoeng aenvih gij hwnghat Aencangj Mancuengh Cingsih, faenh dinfwngz minzcuz gaeuqgeq neix ndaej youq ndaw swncienz mbouj gat mbouj duenh.

Daj gij lizsij gyaeraez Mancuengh, daengz gij goekdaeij vwnzva gak cungj doz conzdungj, hawj Yiz Mingzfung bouxvunz soqlaiz cungj maij gij vwnzva minzcuz neix maez youq ndawde, neix engq hawj de miz gij siengjgap hag daemjman lo. Ndigah, moix ngoenz banringz daengz seiz yietnaiq, Yiz Mingzfung couh caueq mehdaemjrok ndaw aencangj Mancuengh haenx hag daemjman, caemhcaiyouq yungh aen singhiz seizgan dinjdet ndeu rox gij fuengfap daemjman gihbwnj lo.

Haeujlaeg lajmbanj damqra gij vwnzva feihyiz

Va' mbu, vamauxdan, raizmbungqmbaj, raizfwj, raizlwgyoux, raizraemx.....Gij doz Mancuengh gyaundeih gyaqciq hawj Yiz Mingzfung dauqma Namzningz le lij lumz mbouj ndaej. Vihliux vaiqdi sugrox gij fuengfap daemjman, Yiz Mingzfung moix ngoenz roengzban le cungj ciemmonz yungh 1 ~ 2 aen cungdaez daej lienh daemjman.

Rox Yiz Mingzfung doiq Mancuengh miz yinxdaeuz naekna, boux gvanjangj Gvangjsih Bozvuzgvanj Vuz Veijfungh gig haeujcoengh, engq gujli de lai byaijbyaij lai yawjyawj. Vuz Veijfungh ciengzgeiz guh gij hong yenzgiu vwnzva minzcuz gaenq okbanj 《Dauqsaw Gvangjsih Feihvuzciz Vwnzva Yizcanj Guekgyaep—Dinfwngz Daemjman Bouxcuengh》, Yiz Mingzfung ndaej gujli lai hix laeglemx roengzdingh gietsim, mboujdan aeu hag ndei daemjman, lij aeu lai cungsaed caueq fungfouq gij cihsiz Mancuengh.

Doeklaeng, Yiz Mingzfung byaij doh Cingsih, Binhyangz, Dasinh, Yinhcwngz, Sanhgyangh, Hocouh daengj dieg ca mbouj geijlai 10 aen yanghcin geijcib aen mbanj, damcunz canghheiq guh gij huq fwngzguh dangdieg haenx, hagsib doxgyau gij gingniemh daemjman, yenzgiu geiqloeg gij vwnzva Mancuengh. Gij dinfwngz daemjman Yiz Mingzfung hix vih neix menhmenh cingsaeq, engq gyau ndaej haujlai baengzyoux ndei.



▲ Yiz Mingzfung aeu gij Mancuengh baij hawj vunzranz yawj.

Youq Yinhcwngz miz mehdaemjrok geq ndaej caet betcib bi ndeu gig hawj Yiz Mingzfung gamjdoengh. Yinhcwngz Yen dwg dieg goekgaen ok Mancuengh Gvangjsih ndawde dieg ndeu, Mancuengh Yinhcwngz gaenq dwg gij huq Mancuengh Gvangjsih, dangguh gunbinj soengq haeuj ndaw vangzgunh bae. Youq ndaw ndwenngoenz raezrangrang, daemjman gaenq bienqbaenz aen bouhfaenh giepnoix mbouj ndaej ndeu ndaw ndwenngoenz mehdaemjrok geq haenx, de hix guhcingq le Mancuengh hwnghoengh caueq baihdoek.

Najdoi q Yiz Mingzfung lai baez daej cunz, caensim maij hag, mehdaemjrok geq yienzbonj mizdi mbouj maij vunzrog neix dauqdae cuengqsim roengzdaej, sim soeng dwk dang de baenz dahlan nei daej doiqdaih, engq sim' anq dwk gaem dawz aen fwngz Yiz Mingzfung naeuz: "Mancuengh raeuz dauqdae miz vunzlaeng lo, caj gou daemj mbouj ndaej le couh aeu aen congzrok gaeuq ndaw ranz cienz hawj mwngz."

Swncienz feihyiz yenzgiu cauhguh haifat gij huq vwnzva cauxeiq

Bi 2015, Yiz Mingzfung an ranz youq Namzningz, aen hung aen iq song aen congzrok ciemqyouq gij dieg cujyau aen rug, bak lai fan Mancuengh yungh fwngz daemj daj gak dieg soucomz daej haenx bienqbaenz gij doxgaij dajcang cei q miz yinx aen ranz iq raeujrub neix. Ginggvaq 3 bi mboujduenh hag lienh, Yiz Mingzfung doiq daemjman engqgya swnh sim swnh fwngz lo, lij rox gij fuengfap daemj cujyau Mancuengh Gvangjsih gak dieg.

Seiz bozvuzgvanj banh hozdung hung, Yiz Mingzfung couh daenj buhvaq minzcuz vunznoix, bienqbaenz mehdaemjrok unqswnh, baij gij dinfwngz daemjman okdaej hawj gyoengq hekyouz yawj, caemhcaiyouq yungh gij fuengsik haeujlaeg rox ngaih bae

cekgej gij yihi caueq eiqsei baihindaw moix cungj doz conzdungj. Daj ngamq hainduj aenvih maij cix bae hag, daengz haeujlaeg yenzgiu gij vwnzva lizsij de, baenzlawz guh cij ndaej engq ndei bae swncienz caueq hwnghat gij Mancuengh? Yiz Mingzfung hix miz siengjgap moq lo.

Bi gonq, Yiz Mingzfung daj senhgyaubu daengz aen cungsim huq vwnzva cauxeiq guhhong, hainduj yenzgiu aeu gij yenzsu Mancuengh gaeuqgeq haenx yungh haeuj ndaw gij huq ndwenngoenz yungh daihneix bae, bohmeih Yiz Mingzfung gig haeujcoengh de, lij bang de ok cawjeiq, guh di hong yungh fwngz guh bonjfaenh guh ndaej haenx.

Bineix ndwen 9 ngoenz 11, Aenhoih Langhbaij Huq Vwnzva Cauxeiq Gozci Cungguk Baekging Gaiq Daih Cibngeih youq Cungguk Gozci Canjanj Cungsim banh sam ngoenz haenx, gij huq vwnzva cauxeiq baenzdauq Mancuengh Yiz Mingzfung caen fwngz guh haenx baez daih' it baij okdaej hawj vunz lai yawj, yinhsiengh, aengging, habiyw daiq ngaih, gaeu yaekseiz daengj doenghgiu huq gingciengz raen neix deng Mancuengh dajcang moqsag, aenvih gij yiengh lingzgiu youh gig mizyung, ndigah gig ndaej vunz lai angqcoux.

"Gij huq fwngzguh conzdungj miz gij raeuj ndaw fwngz canghheiq guh gij huq fwngzguh, hix miz gij giendingh caueq genheiz gyoengqde. Yienznaeuz gou dwg vunz Bouxgun, hoeng gou nyinhnaeuz moix bouxvunz cungj ndaej bienqbaenz bouxswncienz gij vwnzva minzcuz vunznoix." Yiz Mingzfung gig miz maqmuengh dwk naeuz, de maqmuengh coglaeng ndaej hailaeb gij gocwngz son Mancuengh, caemhcaiyouq yungh aen congzrok iq ginggvaq gaijndei haenx, vih gyoengq lwngyez ndaw hagdangz daezhawj gihvei ndaej raen caueq hag Mancuengh, hawj cehfaen feihvuzciz vwnzva yizcanj youq ndaw sim gyoengq lwngyez doekrag didnyez.